

Il corn da puolvra dad Abraham ed oters raquints

Nouva ediziun dals raquints da Vonmoos (1868–1940)

■ **Be amo pacs as rigordaran da Schimun Vonmoos. Sia parentella, la gliued da Valsot, ils retoromanists varan let ils raquints da quist autur ramoschan. Apaina però cha l'ouvra dad ün autur es exausta dvaint'la displaschailvmaing e sainza lair ün bain exclusiv.** La litteratura rumantscha dess però esser inavant bain visibla illas librerias, illas scoulas e süllas curunas da cudeschs in chasas privatas. E lapro toccan eir ils raquints da Schimun Vonmoos.

Vonmoos es nat e creschü sü a Ramosch, ha stübgia teologia – in Germania, sco blers da seis temp – es lura tuornà in Grischun, es gnü tut sü dal 1892 illa sinoda retica ed es davo stat ravarenda in seis cumün patern pels prossems 48 ons, tuot sia vita professiunala. I's po dir ch'el d'eira ün dret multitalent: sper la pravenda ha Vonmoos fuondà la scoula secundara, la chascha d'amalats publica, el es stat apicultur, ün paschiunà chatschader e pes-chader e d'eira dastrusch a pitschen e grond in seis cumün. E Schimun Vonmoos es eir stat ün scriptur. In seis möd modest e concis ha'l publichà pac ed adüna be cuort, tenor sia maxima chi nu's dess strapatschar massa la pazienza dal public.

Dal 1938 ha Schimun Vonmoos publichà seis unic cudesch da raquints: in rumantsch, e scrit svesa eir in tudaisch, edi da la chasa editura zürigaisa Schweizer Spiegel e cun tschinch illustraziuns dad Alois Carigiet. I'ls ons tschinquanta

ha l'Uniun dals Grischs fat üna nouva ediziun culs istess raquints ed amo oters, adattond però la lingua al standard da quels ons.

Uossa ha la pitschna chasa editura «editionmevinapuorger» realisà üna nouva ediziun dals raquints da Schimun Vonmoos, mettond pais da mantgnair la lingua originala da l'autur, uschea sco ch'el vaiva svesa publichà seis raquints dal 1938.

In üna postfacziun situescha l'editura *Mevina Puorger* a Schimun Vonmoos ed a sia ouvra. Fotografias da l'archiv da *Gertrude e Schimun Denoth* dan a la postfacziun üna taimpra autentica da seis temp.

Per la cuverta ha l'editura tschernü üna perspectiva pac cuntschainta: i's tratta da duos fotografias cha'l fotograf Feuerstein vaiva gnü fat probabel dals ons 30 suot il cumün da Ramosch, cun champs da gran e lingiadas da monas, creond uschea üna vista panoramica da quel cumün chi d'eira üna jada il graner da l'Engiadina.

In duos emischiums dal Radioscola dal 1968 han Luisa Famos ed Andri Peer fat ün omagi a Schimun Vonmoos. Quistas duos emischiums sun gnüdas registradas sün ün disc cumpact chi fa uossa part da la nouva ediziun dals raquints.

I vala la paina da scuvrir danöv il raquintader ramoschan Schimun Vonmoos. Bun divertimaint!

Marga A. Secchi